

**Ni Presidente
Henry B. Eyring**

Umuna a Mammagbaga
iti Umuna a Panguluen



Dagiti Pamilia ken Kararag

Naminsan, iti panagtugawko iti abay ti katre ni tatangko iti rabii, insaritana maipapan ti panagubingna. Insaritana ti maipapan iti ayat dagiti nagannak kenkuana kadagiti narigat a panawen ken ti ayat ti Nailangitan nga Amana ken ti Mangisalakana. Ammoko idin nga agngangabiten isuna iti sakit a kanser, isu a saan a sorpresa kaniak a no dadduma ikaduana dagiti riknana para iti Nailangitan nga Amana iti ayat ken kinasayaat ti naindagaan nga amana. Masansan a kinuna daydi tatangko a no isu idi ket agkararag, pinanunotna a makitana iti panunotna ti isem ti Nailangitan nga Ama.

Insuro dagiti dadakkelnan kenkuana ti pagwadan nga agkararag a kasla makisasao iti Dios ket sumungbat kenkuana ti Dios nga addaan iti ayat. Kinasapulanna dayta a pagwadan agingga iti udina. Idi kimmaron ti sakit, nakitami isuna iti bigat a nakaparintumeng iti abay ti katre. Nakapsut unayen isuna tapno agsubli iti katre. Imbagana kadakami a nagkararag tapno saludsodenna iti Nailangitan nga Amana no apay nga agsagaba unay iti nakaro idinto a kanayon met nga inkarigatanna ti agbalin a nasayaat. Kinunana nga immay ti naasi a sungbat: “Kasapulan ti Dios dagiti natured nga annak a lallaki.”

Ket ngarud nagibtur agingga iti udina, nga agtaltalek a ti Dios ket mangipatpateg kenkuana, dumngeg kenkuana, ket mangitag-ay kenkuana. Isu ket nabendisionan ta naamuanna a nasapsapa ken dinanto kaano man malipatan nga adda managayat a Dios nga asideg a kas iti kararag.

Dayta ti gapu no apay sinuruan ti Apo dagiti nagannak, “Ket isuroda pay dagiti annakda nga agkararag, ken magna a sililinteg iti sanguanan ti Apo” (DkK 68:28).

Naisublin ti ebanghelio ni Jesucristo—agraman ti Libro ni Mormon ken amin a tulbek ti priesthood a makapagbegkes kadagiti pamilia—gapu ta ni Joseph Smith ket nagkararag a kas maysa nga ubing nga addaan pammati. Nagun-odna dayta a pammati iti maysa a naayat ken napudno a pamilia.

Duapulo a tawenen ti napalabas inted ti Apo daytoy a balakad kadagiti pamilia iti “Ti Kaamaan: Maysa a Waragawag iti Lubong” manipud iti Umuna a Panguluen ken ti Korum dagiti Sangapulo-ket-dua nga Apostol: “Dagiti naballigian a kallaysa ken kaamaan ket maipasdek ken mapagtalinaed kadagiti pagbatayan ti pammati, panagkararag, panagbabawi, panagpakawan, respeto, ayat, panangngaasi, aramid, ken dagiti makaay-ayo nga aktibidad iti panagaliwaksay.”¹

Dakkel ti utangtayo a panagyaman iti pamilia ni Joseph Smith a Propeta para iti pannakapadakkelnan. Impagwadan ti pamiliana saan laeng a ti pammati ken panagkararag no di ketdi pay panagbabawi, panagpakawan, respeto, ayat, panangngaasi, aramid, ken dagiti makaay-ayo nga aktibidad iti panagaliwaksay.

Dagiti kaputotan a dumteng kalpasanyo ket mabalin nga awagandakayo a nabendisionan gapu iti pagwadan ti panagkararag iti pamilyayo. Mabalina a dikayo makapatanor

iti naindaklan a katulongan ti Dios, ngem mabalinyo babaen ti panagkararagyo ken ti pagwadanyo iti kinapudno ket makatulong ken ni Apo Jesucristo a mangpatanor kadagiti nasayaat ken ipatpateg a disipulo.

Maipapan ti amin dayta mabalin a pilienyong ti agaramid a makatulong iti Apo, ti kararag ti addanto iti tengnga daytoy. Nalawag nga adda dagiti gagangay a tao a, no agkararagda, maparegtada dagiti dadduma a mangimulagat kadagiti matada tapno makitada no asino ti adda sadiay. Makapagbalinkayo a kakasdiay a tao.

Panunotenyong no ania ti mabalin a kaipapanan dayta kadagiti makipagparintumeng kadakayo iti sangapamiliaan a panagkararag. No mariknada a makisasaokayo iti Dios iti pammati, pumigsanto ti pammatida tapno makisaoda met iti Dios. No agkararagkayo tapno agyaman iti Dios kadagiti parabur nga ammoda a dumteng, dumakkello ti pammatida nga ay-ayaten ida ti Dios ken sungsubatanna dagiti kararagyo ken sungbatannanto dagiti kararagda. Mabalin a mapasamak laeng dayta iti sangapamiliaan a panagkararag no naaddaankayon iti dayta a padas iti panagkararag nga agmaymaysa, a masansan.

Naparaburannak pay laeng iti maysa nga ama ken maysa nga ina a makisasao iti Dios. Ti pagwadanda iti bileg ti kararag kadagiti pamilia ket parabur pay laeng kadagiti kaputotan a dimteng kalpasanda.

Dagiti annakko ken appokok ket maparparaburanda iti inaldaw babaen ti pagwadan dagiti dadakkelko. Ti pammati nga adda managayat a Dios a dumngeg ken mangsubat iti kararag ket naiyallatiwen kada-kuada. Makaparnuaykayo iti kasta a tawid iti pamiliayo. Ikarkararagko a maaramidyonto.

PAGADAWAN

1. "Ti Kaamaan: Maysa a Waragawag iti Lubong," *Liahona*, Nob. 2010, 129.

RAMBAKAN TI MAIKA-20 NGA ANIBERSARIO TI WARAGAWAG ITI KAAMAAN

"Ti Kaamaan: Maysa a Waragawag iti Lubong," ket mangisuro kadagiti pagbatayan nga apagpagisu a kasapulan ita kas idi immuna a naidatag idi Septiembre 23, 1995. Mangawis kadagiti indibidwal wenno pamilia

a sursuruanyo tapno mangrampak iti maika-20 nga anibersario ti waragawag babaen ti:

1. Panangilista kadagiti pagbatayan a linaonna nga addaan iti naisangayan a pateg para kadakuada. (Kitaen no kasano nga aramiden nga addaan iti kararag ni Presidente Eyring iti mensahe a nadakamat.)
2. Iti panangilawlawag no kasano a mangbendision kada-kuada ti tunggal pagbatayan ita ken iti masakbayan.
3. Ti panangituding kadagiti nalawag a panggep a tuinyoen tapno mausarda dagita a pagbatayan iti biagda ken mangibinglay kadagitoy kadagiti dadduma.

AGTUTUBO

Panangaramid iti Panagkararag

I suro ni Presidente Eyring a maparaburan ti pamiliayo babaen ti natibker a pannakilangenyong iti Nailangitaan nga Ama. Mapasayaatyong ti pannakilangenyong Kenkuana babaen ti panangpasayaatyong kadagiti kararagyo! Dagitoy ti sumagmamano a kapanunotan ti no kasano nga aramiden daytoy:

Sakbay a rugianyong ti kararagyo, agpanunotkayong iti sumagmamano a kanito maipanggep iti kayatyong nga isao. Mangpanunot kadagiti saludsod a mabalin nga adda kadakayo wenno bambanag a mangburburibor kadakayo—mabalinyong pay nga isurat dagitoy tapno diyo malipatan. Usarenyong pay daytoy nga oras a manglawag iti panunotyong manipud kadagiti arimbangaw ti aldaw tapno maimutektekanyong dagiti naalumamay nga impresion ti Espiritu Santo. No ti panpanunotyong ket agalla-alla kabayatan ti panagkararagyo, padasenyong ti mangiladawan iti panunotyong a dumdumngeg ti Nailangitan nga Ama. Makisao iti nalawag. Kasta met a, mangibati iti sumagmamano a minuto iti gibus ti kararag tapno dumngeg kadagiti parikna ti Espiritu. Mabalinyong nga isurat dagiti impresionyong iti journalyong.

Laglagipen a ti kararag ket maysa a kita ti aramid, isu a saankayong a madanangan no kasapulan ti panangsanay wenno kasla narigat! Ti panangikarigatanyong iti panagkararag ket makatulong kadakayo a mangpanday iti relasyonyong iti Dios a mangbendision kadagiti kaputotan.

Maysa a Palagip iti Kararag

Isuro ni Presidente Eyring a napateg ti makipagkarakag iti pamilyayo. Makapagbalinkayo a maysa a pagwadan iti pamilyayo babaen ti panagkararag iti inaldaw. Mabalinyo pay nga ipalagip iti pamilyayo nga agkararagkayo nga aggigigiddan iti inaldaw. Laglagipen daytoy nga adaw manipud iti sabali pay a bitla ni Presidente Eyring: “Denggen ti Nailangitan nga Ama dagiti kararagyo. Ay-ayatennakayo. Ammona ti naganyo” (“Continuing Revelation,” *Liahona*, Nob. 2014, 73). Isuratyo daytoy nga adaw a sao iti kard wenno papel ket ikabilyo daytoy iti lugar a makitanto ti sibubukel a pamilyayo daytoy. Iti kastoy a wagas malagipyo a kanayon a kayat ti Nailangitan nga Ama ti dumngeg kadakayo!

© 2015 ti Intellectual Reserve, Inc. Nailatang amin a karbengan. Naimaldit iti EUA. Pannakaanamongna iti Ingles: 6/15. Pannakaanamongna a maipatarus: 6/15. Pannakaipatarus ti *First Presidency Message, September 2015*. Ilokano. 12589 864



Pammati, Pamilia, Tulong

Dagiti Nadiosan a Kababalin ni Jesucristo: Nabileg ken Napnuan iti Dayag

Nainkararagan nga adalenyo daytoy a material ken kalikagumanyo nga ammuen no ania ti ibinglayyo. Kasano a ti pannakaawatyo kadagiti nadiosan a kababalin ti Mangisalahan ket mangpapgisa iti pammatiyo Kenkuana ken mangparabur kadagiti ay-aywananyo babaen ti visiting teaching? Para iti ad-adu pay nga impormasion, mapan iti reliefsociety.lds.org.

Daytoy ti paset ti maysa a serye dagiti Mensahe iti Visiting Teaching a mangitampok kadagiti nadiosan a kababalin ti Mangisalahan.

Isuro dagiti nasantuan a kasuratan kadayo a ni Jesucristo “inawatna ti amin a bileg, iti langit ken iti daga, ken adda kenkuana ti dayag ti Ama” (DkK 93:17). Kinuna ni Elder M. Russell Ballard ti Korum dagiti Sangapulo-ket-dua nga Apostol a babaen daytoy a bileg pinarsua ti Mangisalahan dagiti langit ken daga, nagaramid kadagiti milagro, ken nagibtur iti saem iti Getsemani ken Kalbario.¹ No maawatantayo daytoy, dumakkel ti pammatitayo ken ni Cristo, ket agbalintayo a napigpagsa.

Bayat ti panagaramid ken panag-tungpaltayo kadagiti katulagan iti templo, bendisionannatayo ti Apo iti bilegna. Kinuna ni Linda K. Burton, Relief Society general president: “Ti panagtungpal kadagiti katulagan ket mangpapgisa, mangpabileg, ken mangsaluad. Naam-ammok itay nabiit ti ipatpateg a kabarbaro a gayyem. Impaneknekna a kalpasan ti panangawatna iti endowment iti

templo, nariknana a napapigsa iti bileg a mangliklik kadagiti sulisog.”²

Mangiburay ni Nephi iti pamma-neknek maipapan iti bileg ti katulagan: “Siak, ni Nephi, nakitak ti bileg ti Cordero ti Dios, a bimmaba . . . kadagiti natulagan a tattao ti Apo, ken naarmasanda iti kinalinteg ken bileg ti Dios iti naindaklan a dayag” (1 Nephi 14:14).

Dagiti Mainayon a Nasantuan a Kasuratan

Jeremias 51:15; Apocalipsis 1:6; Jacob 4:6–7; Mosiah 3:17

Manipud kadagiti Nasantuan a Kasuratan

Iti pannakapnona iti nalaus a panangngaasi kada Marta ken Maria, pinagungar ni Jesucristo ti kab-satda a ni Lazaro manipud iti patay babaen ti bileg ti Dios nga adda Kenkuana.

Simmangpet ni Jesus iti balay da Marta ken Maria uppat nga aldaw kalpasan ti kaadda ni Lazaro iti tanemna. Napanda iti tanem ni Lazaro, ket imbilin ni Jesus a maikkat ti bato a nangkalub iti

pagserkan. Kinuna ni Jesus ken ni Marta, “Diak aya kinuna kenka, a no mamatika, makitam ti dayag ti Dios?” Kalpasanna nagkara-rag iti Dios Ama ket “pimmuk-kaw iti napigsa a timek, Lazaro, rummuarka.

“Ket daydi natay rimmuar a sipapatapat, dagiti im-ima ken saksakana kadagiti bedbed.” (Kitaen iti Juan 11:1–45.) Usaren ti Mangisalahan ti bilegna a mang-subbot ken magpabileg kadayo. Dumakkelto ti pammatitayo Kenkuana no laglagipentayo nga Isu ket napnuan iti bileg ken dayag.

DAGITI NAGADAWAN

1. Kitaen iti M. Russell Ballard, “This Is My Work and My Glory,” *Liahona*, Mayo 2013, 18.
2. Linda K. Burton, “The Power, Joy, and Love of Covenant Keeping,” *Liahona*, Nob. 2013, 111.

Ibilang Daytoy

Kasano a maarmasannatayo ti bileg ti Dios iti bileg ken dayag?